



Inatsisartunut ilaasortaq Mikivsuk Thomassen, Inuit Ataqatigiit
Inatsisartut Allattoqarfiat
/Maani

**Tusass A/S' taassumalu Qaanaami allaffiata matuneqarnera pillugu § 37
naapertorlugu apeqquteqaammut nr. 2022/15-imut akissut.**

15-03-2022

Postboks 1015
3900 Nuuk
Oqarasuaat (+299) 34 50 00
Fax (+299) 32 50 02
E-mail: govsec@nanoq.gl
www.naalakkersuisut.gl

Asasara Mikivsuk Thomassen,

Ingerlatseqatigiiffinnut Namminersorlutik Oqartussanit pigineqartut ilaannut
ataatsimut ingerlatsinermit suliassaqarfik pillugu Inatsisartut suleriaasianni § 37
naapertorlugu Naalakkersuisunut apeqquteqarputit. Apeqqutigisatit uannit
akisassanngortinneqarsimapput.

Apeqqutigineqartut Tusass A/S-imi attaveqaatersuutinut sulissinernullu
taamaasillutillu Tusass-ip ulluinnarni ingerlatsineranut tunngassuteqarmata
ingerlatseqatigiiffiup aqutsisuinut aammalu Ineqarnermut
Attaveqaasersuutinullu Naalakkersuisoqarfimmut ingerlatseqatigiiffimmut
suliassaqarfittut naalakkersuisoqarfiusumut akissutissanik
pissarsiniartoqarsimavoq.

Apeqqutigineqartut ima oqaasertaqarput:

**1. Naalakkersuisut Qaanaami tusass allaffeqarfia
matuinnarneqartoq pissusissamisoortutut isigivaat?**

Ilisimatitsissutigisinnaavara ingerlatseqatigiiffinnik Namminersorlutik
Oqartussanit pigineqartuni suliassat piginnittuunermit tunngasut piginnittut,
siulersuisut ingerlatseqatigiiffinilu ulluinnarni aqutsisut ingerlatseqatigiiffinnullu
inatsimmi allassimasut naapertorlugit naalakkersuisunit isumagineqarmata.

Ilanngullugu oqaatigineqarsinnaavoq ingerlatseqatigiiffiit Namminersorlutik
Oqartussanit pigineqartut ullumikkut ingerlatseqatigiit ataasiakkaat
malittarisassaat, ilaatigullu inatsisit ingerlatseqatigiiffinnut
malitassanngortinneqarsimasut, akuersissutit kiisalu kiffartuussinissamik
isumaqatigiissutit naapertorlugit ingerlanneqartarmata. Tusass A/S -imoqqissaaq
tunngatillugu ingerlatsinerit nalinginnaasut eqqarsaatigalugit

kiffartuussinissamik isumaqatigiissuteqarfigineqarsimanngilaq ingerlatseqatigiiffillu Allakkerineq pillugu Inatsisartut inatsisaat nr. 3, 15. april 2011-imeersoq aammalu Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaat nr. 31, 23. november 2017-imeersoq naapertorlugit ilaatigut ingerlanneqarluni. Inatsisit pineqartut taakkulu malillugit nalunaarutit suliarineqarsimasut aqqutigalugit allakkerinermut attaveqaatersuutinullu tunngatillugu Tusass A/S'-ip pisussaaffii aalajangersarneqarsimapput.

Allakkerinermut tunngatillugu Tusass A/S-ip pisussaaffigaa nassiussat nunaqarfimmut illoqarfimmulluunniit qaniginerpaasamut nassiunneqarsimasut tiguneqartarnissaat assartorneqartarnissaallu. Tamanna najukkami namminerisamik allaffeqarnikkut pisinnaavoq, taamatulli allaffeqarnissaq piumasqaataanani.

Tele attaveqaatersuutit eqqarsaatigalugit Tusass A/S-ip najukkani ataasiakkaani pisiniarfeqarnissaa atuisartulluunniit eqqarsaatigalugit aalajangersimasumik attavigisinnaasamik saaffissaqarnissaa inatsisitigut piumasqaataanngilaq.

Matumani § 37 naapertorlugu apeqqutigineqartut akiniarneranni tassunga atugassanik Tusass A/S-imit akissutissanik pissarsiniartoqarsimavoq, imaattunillu akissuteqarpoq:

"Siuliani pineqartut eqqarsaatigalugit Tusassip Siulittaasup Naalakersuisoqarfimmut ilisimatitsissutigissavaa atuisartut ullumikkornit pitsaannerusumik sullissinnaajumallugit Qaanaami teknikkikkut atortut Tusassimit piffissami sivisuummi sulissutigisimallugit. Qaanaami ineriartortitsineq teknikkikkut periarfissat naapertorlugit ingerlanneqarpoq.

Allakkat nassiussallu eqqarsaatigalugit Tusass 1997-imiilli Pilersuisumik naammaginartumik suleqateqarsimavoq, taamaasiornikkut najukkani pisiniarfii aqqutigalugit innuttaasut allakkatigut nassiussassaat tigusassaallu isumagineqartarlutik, tamatumalu saniatigut akiligassanut tunngasut isumagineqartarsinnaallutik. Mobiltelefoninik pisiniat eqqarsaatigalugit Pilersuisup tamakku pisitartuminnut neqeroorutigisarpai.

Tusassimi attaveqaatersuutit pitsannorsarnissaannut nutarternissaannullu Tusassip periusissiaa nutaaq naapertorlugu "satellit-eqarfittut" taaneqartartuni attaveqaatit pitsannorsarnissaannut Tusassip suliani annertoq 2020-mi aallartippaa. Suliniut taanna Tasiilami nunami nutaamik sakkortusaaviliortoqarneratigut 2020 aasakkut aallartinneqarpoq. Suliaq 2021-mi Ittoqqortoormiini nanginneqarpoq taamaasillunilu Ittoqqortoormiinilu innuttaasut attaveqaatini tunisassianik flatratetitit ittunik ullutsinnut

naleqquttunik nutaaliaasunillu 2021-p naalernerani atuisinnaalerlutik. Qaanaami attaveqaatersuutit nutarternissaat tullinnguuppoq, tassa Tusass taavani nutaamik sakkortunerusumillu sakkortusaaviliisoqassalluni suliallu 2022-p ingerlanerani naammassineqarnissaa naatsorsuutigineqarluni. Sakkortusaaviup nutarterlugulu sakkortusineratigut atuisut attaveqaatini tunisassianik flatratetitit ittunik ullutsinnut naleqquttunik nutaaliaasunillu atuisinnaalissapput.

Tusass Qaanaami ataatsimik sulisoqartuarsimavoq pineqartorlu atorffimminit tunuarluni. Pitsaanerpaamik ingerlatsisoqarnissaa qulakkeerniarlugu pissutsit Tusassimit ingerlaavartumik nalilersorneqartarput. Teknikikkulli periarfissat nutaat eqqunneqarnerisigut teknikikkut atortuusimasunit allaanerusumik piginnaasalinnit suliarineqartalersussaapput. Tamatuma kingunerisaanik atortutigut suliassat immikkut piginnaasalinnit assigiinngitsunit isumagineqartalertussaapput atortunillu nakkutiginninnivik assersuutigalugu Nuummit piginnaasalinnik sulisoqareerfusumi isumagineqalersussaalluni. Suliassat pineqartut immikkut piginnaasalinnit assigiinngitsunit isumagineqartartussat ajoraluartumik inummit ataatsimit Tusassimit isumagineqalersinneqarsinnaanngitsut. Taamaattumik pitsaanerpaamik angusaqarnissaq aammalu Qaanaami atuisut tunisassianik pissarsisarnissaasa qulakkeerneqartarnissaa Tusassimit ingerlavartumik nalilersorneqartartussaavoq..”

2. Naalakkersuisut Qaanaami tusass aqqutigalugu sullinneqarsinnaaneq toqqaannartumik siunissami qanoq takorloorpaat?

Akissut: Ingerlatseqatigiiffiup ulluinnarni ingerlanneqarnera Naalakkersuisunit isumagineqarneq ajormat ingerlatsinerit ataasiakkaat Naalakkersuisunit oqaaseqarfigineqarsinnaanngillat apeqquutillu 1-ip Tusassimit akineqarnissaa innersuussutigalugu.

3. Naalakkersuisut Qaanaami Tusass allaffeqarfia atorunnaartussatut takorluugaava?

Naalakkersuisut Tusass A/S-imi ulluinnarni ingerlatsisuugatillu aalajangersaasuunngimmata ingerlatseqatigiiffiup ulluinnarni ingerlanneqarnerata aaqqissorneqarsimaneranut tunngasunik aalajangersaaneq ajorput.

Apeqqummut saqqummiunneqartumut allanik ilassutissaqanngilanga.

Inussiarnersumik inuulluaqqusillunga

A handwritten signature in black ink, consisting of stylized, cursive letters that appear to be 'ME' followed by a long horizontal stroke.

Múte Bourup Egede